

Apelacioni sud Brčko distrikta Bosne i Hercegovine u vijeću sastavljenom od sudija Damjana Kaurinović, kao predsjednika vijeća i sudija Ilje Klaić, Srđana Nedić, Dragane Tešić i Maide Kovačević, kao članova vijeća, u postupku ocjene usklađenosti pravnih akata Brčko distrikta Bosne i Hercegovine, postupajući po inicijativi ...: S.G., M.P. i P.B., na osnovu člana 27. tačka h. Zakona o postupku ocjene usklađenosti pravnih akata Brčko distrikta Bosne i Hercegovine („Službeni glasnik Brčko distrikta BiH“, broj 20/10), na sjednici vijeća održanoj dana 07.07.2014. godine, d o n i o j e

R J E Š E N J E

ODBACUJE SE inicijativa za ocjenu usklađenosti Odluke Skupštine Brčko distrikta Bosne i Hercegovine o produženju mandata glavnog revizora i zamjenika glavnog revizora broj: 01-02-248/14 od 12.03.2014. godine (objavljena u „Službenom glasniku Brčko distrikta BiH“, broj 10/14), sa članom 39. Statuta Brčko distrikta Bosne i Hercegovine („Službeni glasnik Brčko distrikta BiH“, broj 2/10) i članom 26. Zakona o reviziji javne uprave i institucija u Brčko distriktu Bosne i Hercegovine („Službeni glasnik Brčko distrikta BiH“, broj 40/08).

ODBACUJE SE zahtjev za obustavu izvršenja Odluke Skupštine Brčko distrikta Bosne i Hercegovine o produženju mandata glavnog revizora i zamjenika glavnog revizora broj: 01-02-248/14 od 12.03.2014. godine (objavljena u „Službenom glasniku Brčko distrikta BiH“, broj 10/14).

Obrazloženje

Dana 25.04.2014. godine, ...: S.G., M.P. i P.B., podnijeli su inicijativu za ocjenu usklađenosti Odluke Skupštine Brčko distrikta Bosne i Hercegovine o produženju mandata glavnog revizora i zamjenika glavnog revizora broj: 01-02-248/14 od 12.03.2014. godine (u daljem tekstu: Odluka), sa članom 39. Statuta Brčko distrikta Bosne i Hercegovine i članom 26. Zakona o reviziji javne uprave i institucija u Brčko distriktu Bosne i Hercegovine.

Podnosioci inicijative navode da je mandat glavnom revizoru i njegovim zamjenicima istekao 28.02.2014. godine, a osporavana Odluka donesena 12.03.2014. godine, što znači da ima retroaktivno dejstvo, zbog čega je u suprotnosti sa članom 39. stav 2. Statuta Brčko distrikta Bosne i Hercegovine. Dalje se navodi da je članom 39. u stavu 2. Statuta Brčko distrikta Bosne i Hercegovine propisano da samo u izuzetnim slučajevima određene odredbe zakona mogu imati retroaktivno dejstvo i to pod uslovom da Skupština zaključi da za takvu odluku postoji uvjerljiv javni interes, a da u konkretnom slučaju javni interes nije postojao. Sem toga, podnosioci inicijative navode da je Odluka u suprotnosti i sa članom 26. Zakona o reviziji javne uprave i institucija u Brčko distriktu Bosne i Hercegovine, jer je Skupština iz proceduralnih razloga propustila da na vrijeme izvrši izbor i imenovanje glavnog revizora i njegovih

zamjenika. Podnosioci inicijative su predložili da se donese rješenje kojim bi se do donošenja konačne odluke obustavilo izvršenje osporavanog akta.

U skladu sa odredbom člana 15. Zakona o postupku ocjene usklađenosti pravnih akata Brčko distrikta Bosne i Hercegovine i rješavanja sukoba nadležnosti i člana 8. Poslovnika o radu Apelacionog suda Brčko distrikta Bosne i Hercegovine u postupcima ocjene usklađenosti pravnih akata Brčko distrikta Bosne i Hercegovine i rješavanju sukoba nadležnosti, Sud je dopisom broj 97 o U 001467 14 Ous od 08.05.2014. godine zatražio mišljenje donosioca osporavanog akta o podnesenoj inicijativi.

Dopisom broj, 01-05-597/14 od 19.05.2014. godine, Predsjednik Skupštine Brčko distrikta Bosne i Hercegovine, kao donosilac osporavanog pravnog akta, dao je mišljenje o inicijativi, u kome navodi da je Odluka donesena u skladu sa članom 26. stav 11. Zakona o reviziji javne uprave i institucija u Brčko distriktu Bosne i Hercegovine i ostalim zakonskim osnovama navedenim u preambuli iste. U mišljenju je dalje navedeno da je Odluka donesena po sili zakona, kao posljedica proteka roka u kome je trebao biti imenovan novi glavni revizor i njegovi zamjenici, a što nije učinjeno iz objektivnih razloga. Imajući u vidu navedene razloge, donosilac smatra da osporavani akt ima samo deklaratoran karakter.

U postupku ocjenjivanja usklađenosti predmetne Odluke, Sud je utvrdio da je već odlučivao o ocjeni usklađenosti istog akta sa odredbama člana 39. Statuta Brčko distrikta Bosne i Hercegovine i odredbama člana 26. Zakona o reviziji javne uprave i institucija u Brčko distriktu Bosne i Hercegovine. Naime, u predmetu broj 97 o U 001456 14 Ous, rješenjem od 16.06.2014. godine, nije prihvaćena inicijativa za ocjenu usklađenosti Odluke.

Upoređujući pravni smisao navoda i razloga datim u predmetnoj inicijativi, sa navodima i razlozima datim u inicijativi u predmetu broj 97 o U 001456 14 Ous, evidentno je da se radi o identičnim činjenicama o kojima je odlučeno rješenjem broj 97 o U 001456 14 Ous od 16.06.2014. godine.

Imajući u vidu navedeno i činjenicu da predmetnom inicijativom nisu dati novi navodi i razlozi u odnosu na inicijativu u predmetu broj 97 o U 001456 14 Ous, Sud je odlučio da u skladu sa odredbom člana 27. tačka h. Zakona o postupku ocjene usklađenosti pravnih akata Brčko distrikta Bosne i Hercegovine, nema osnova za ponovno odlučivanje, jer se radi o presuđenoj pravnoj stvari.

Sud takođe zapaža, da se donošenjem osporavanog pravnog akta ne ukida, niti se umanjuje nijedno već stečeno pravo, obzirom da zakon precizno propisuje proceduru imenovanja i trajanja mandata glavnog revizora i njegovih zamjenika koji osporenim Odlukom nisu dovedeni u pitanje.

Konačno, donošenje osporavanog pravnog akta pozivom na Zakon o reviziji javne uprave i institucija u Brčko distriktu Bosne i Hercegovine predstavlja i odraz cjelishodne procjene donosioca predmetnog akta, a cjelishodnost ili opravdanost takvih zakonskih rješenja Sud nije nadležan da ocjenjuje.

Obzirom da je Sud donio konačnu odluku, odbacio je zahtjev za obustavu izvršenja akta u skladu sa odredbom člana 36. stav 3. Zakona o postupku ocjene usklađenosti pravnih akata Brčko distrikta Bosne i Hercegovine.

Imajući u vidu navedeno, Sud je odlučio kao u izreci odluke, u skladu sa članom 27. tačka h. Zakona o postupku ocjene usklađenosti pravnih akata Brčko distrikta Bosne i Hercegovine.

BOSNA I HERCEGOVINA
APELACIONI SUD BRČKO DISTRIKTA
BOSNE I HERCEGOVINE
Broj: 97 o U 001467 14 Ous
Brčko, 07.07.2014. godine

PREDSJEDNIK VIJEĆA

Damjan Kaurinović

Da je ovaj otpravak rješenja
saglasan sa izvornikom
tvrdi i ovjerava pisarnica Suda